

Formador ta kere cu e oportunidadnan economico ta hopi grandi den e siguiente cuatro añanan



ORANJESTAD(AAN): Formador Mike Eman, nombra door di Gobernador Freddy Refunjol for di dialuna ta den reunion cu gremio y sindicatonan riba puntonan cu nan ta desea pa Gobierno nobo tene cuenta cune den e siguiente gobernacion.

Na final di e encuentronan di diahuebs, a combersa cu Formador Eman, kende a splica cu e lista cu a haya di cada sindicato, pa loke ta preocupacion, ta hopi. Pero tambe ta asina cu sindicatonan por lo general ta hopi contento con temanan grandi a worde atendi.

Pero tambe temanan cu antes a worde masha hopi aña pa nan worde trata, manera inschaling, bevordering, periodieken, pero tambe pa sa con a maneha e problemanan di fondo di pensioen, con a atende cu e perdida di

kleding toelage, cualnan pa personanan cu ta traha duro tur dia ta importante.

A pidi pa e siguiente gobierno y ministernan tene cuenta cu esaki y cu ta aspectonan cu ta regla den leyman cu ta hopi bieu pa cual mester di revision den e proximo añanan. E formula di Formador pa topa cu gremio y sindicatonan ta algo cu a haci na 2009 caba. El a funciona? Na pensamiento di e Formador, esaki ta e caso. Na 2009 un tema cu gran mayoria a pidi p'e tabata Dialogo Social, tur a bisa cu los di nan inki-etudnan, ta cu den pasado no tabatin porta habri pa papia, pa consulta, pa dialoga y duna idea.

Gobierno di e tempo ey a cumpli pa crea e plataforma, Dialogo Social, cual a percura pa resolve pa hopi di e dolor y problemanan cu

e diferente gruponan a presenta na Gobierno e tempo ey. Pesey awe, e ta kere, tin un satisfaccion hopi grandi y por mira esaki den e resultado di e eleccion. Awor pa e proximo cuatro añanan, pesey e reunionnan di e siman aki ta importante. A puntra formador con lo atende e economia cu kizas mester crece. Formador Mike Eman a splica cu ultimo cuater ñanan despues di un caida di -15% den e economia, awendia e ta varia entre +3 of +4%.

Eman a bisa: "Esaki ta ilustra un verschuiving dramático di mas o menos 18%, cual ta nifica cu e economia a crece substancialmente." Esaki, el a agrega, ta worde reconoci den tur e rapportnan cu a worde traha. Tambe tabatin elogio pa e plan di inversion di Gobierno cu a crea hopi trabao,

expansion y renobacion di Aruba cu a crea un base hopi mas fuerte pa confianza den futuro di Aruba. Y tambe un crecimiento fuerte di Turismo. E aspectonan aki ta loke cu Gobernador a pidi pa e siguiente Gobierno sigui den e direccion aki. Formador ta kere cu e oportunidadnan economico ta hopi grandi den e siguiente cuatro añanan, entre otro door di mudamento di waf, Green Corridor, Hospitalo nobo, MFA-nan, construccion di Hard Rock Hotel. Pues trabao ta bay tin hopi pero tambe oportunidad grandi pa inversion di parti di sector priva, den un cuadro fiscal nobo cu Gobierno a crea. "Nos ta hopi contento cu e prome señalnan cu nos ta haya y e base cu a worde poni pa un di tres pilar economico," Eman a duna di conoce.

**Telefonnan
di DIARIO
582-6747
Fax
582-8551**